

欽定剿平三省邪匪方略

正編

九

三



欽定剿平三省鄂匪方略正編卷二百十二

庚申年

十月二十四日

癸酉

長齡奏言查高馬二逆剿敗

後直向西南之北塔三岔順水寺一帶狂奔該

處西北兩面均通陝界東來則有

臣

勁旅南達

竹山匪衆旣因陝省乏食必思闌入楚地若不

乘此勝兵盡力殲除難免蔓延之勢

臣

於十二

日卽由陳家莊葛藤壩一帶進擊察看匪徒屯

聚之區俱係深林窄徑並將道路挖斷間有不
能行馬之處該匪見有官兵或分或合盡據陡
坎拋擲石塊我兵無從著力實爲憤懣隨派侍
衛常祿章京喜尙阿等帶吉林馬兵分爲二隊
章京常泰五達子定柱等帶黑龍江官兵分爲
三隊叅將海麟馬德舒遊擊拉里等帶兩粵官
兵分爲二隊共分七路臣率領侍衛呢瑪善知

府周季堂等接應各隊分投繞覓小徑逐漸圍
裏該匪情急拚命抗拒勢極兇悍相持三時之

久經各隊馬步兵勇鎗箭礮轟不下三百餘名

滾巖跌斃者不計其數見有手執大白旗賊目

率衆於深溝內撲我馬隊

臣

督率兵勇直前衝

殺鄉勇頭人武童王定富朱上錦首先衝入賊

隊當時被害呢瑪善及驍騎校阿穆昌阿腿受

牙傷佐領忠福委官青山外委曹正榮均受石

傷馬步兵勇無不憤恨奮力迎擊立時殺斃賊

匪二百餘名並擒獲執藍旗之賊二名餘匪慌

亂盡棄馬騾旗矛翻山疾竄由馬溜溝大影坡

高橋出東河口至齊家坪官兵乘勝追擊八十

餘里沿途俘戮賊匪二百餘名時已昏暮鍋帳

本未隨帶卽諭令各員攢集各隊稍爲憩息隨

營糧員知州魏耀解到乾糧軍火當卽分給各

兵勇臣復於五鼓率兵進追該匪徹夜未停由

藍峪河進猪腸溝石佛寺田溝翻貸寶山直竄

鄧家河似有向保豐之勢一日夜已奔一百五

十餘里臣復踰覓抄徑由桃園一帶兜截我兵

甫到而匪衆已至馬步兵勇併力夾擊斬獲五
百餘名生擒白布裹頭身穿紅襖之馬賊二名

步賊一百餘名匪衆紛紛潰敗仍向西南陳家

河一帶狂奔因官兵兩晝夜窮追卽於該處暫

紮當將獲犯審訊據鄒順供認係僞先鋒屢經

打仗本四川達州人在營三年高掌櫃旗上寫

高家營馬五旗上寫馬元帥營裏是馬掌櫃管

事本是兩營高掌櫃是黃號馬掌櫃是藍號手

下五路先鋒有陳張廖石同我共五人他們係

四川陝西湖廣江南人我們本意爲陝省短少糧食要來湖北想搶渡黃龍灘就可下至均州穀城襄陽容易焚掠因索倫馬箭利害兩次喫虧不能過河馬掌櫃說翻嶺走小路至竹山過堵河到房縣就可到保康南漳亦可到襄陽不料官兵日夜追殺馬掌櫃說如不能過堵河仍回舊路向黃龍灘總要下湖北省去又據馬賊

二名供係楊大順王興俱充大頭目餘匪馮大

富等一百零五名俱是探馬矛手實係正賊均

卽正法其餘散出之李宗盛男婦等一千餘名

訊係陝省良民給以路票概行釋放所獲騾馬

器械已分賞兵勇伏查高馬二逆蓄意竄楚非

由黃龍灘卽思偷渡堵河欲向保南均穀襄陽

以爲苟延殘喘之計現就臣兵力祇能顧此一

路惟有踹覓抄徑設法兜剿一面飛咨倭什布
如邊卡賊蹤稍遠卽移駐竹山相機堵截其黃
龍灘一路業經臣屢次札囑總兵德昌並咨會
姜晟派委妥員實力嚴防毋使竄越此次傷亡
兵勇容俟查明咨部奏入

上命軍機大臣傳諭長齡曰長齡前在王家坪鮑家
店大坪等處兩次剿賊得勝此次復率勁兵抄道

迎截七路並進窮追兩晝夜共殲擒賊匪一千四
百餘名拏獲僞先鋒鄒順賊目楊大順王興又散
出男婦一千餘人連獲勝仗三次實屬奮勇可嘉
長齡著賞給白玉喜字牌四喜玉搬指大小荷包
並發去搬指搬指套各十件分賞軍營出力人員
再前此因吉林黑龍江及兩粵官兵打仗出力會
賞給銀牌一千面此次又復殺賊多名實爲出力

著再發去一兩重銀牌五百面五錢重銀牌五百

面交長齡賞給打仗奮勇官兵以示獎勵高二馬

五等股賊匪最爲兇悍今經長齡設法兜剿若能

趁此兵威勝勢將二逆一焚殲擒不留餘孽再當

加以恩獎長齡俟肅清此股賊匪聽候經畧調遣

再往他處剿辦倘高馬二逆一時未能剿盡或折

竄入川長齡當率領勁旅隨賊所向奮力殲除不

可任其竄匿爲要至所奏訊據獲賊供稱高馬二
逆因陝省無糧可掠總思竄往湖北長齡已飛咨
倭什布移駐竹山並札囑總兵德昌又咨會姜晟
派委妥員防堵黃龍灘一路此則倭什布德昌專
責著姜晟行知伊二人實力防堵毋使賊匪一名
闖入倘稍有疎虞惟伊二人是問昨據額勒登保
奏高二馬五王廷詔等股俱在竹山白河一帶何

以長齡摺內祇稱高馬二逆未經提及王廷詔該
首逆係屬教匪要犯或隱匿姓名希圖逃竄長齡
於獲賊時當留心訪問勿任漏網再額勒登保昨
奏稱高二等股賊匪大勢不能竄楚札知慶溥會
同長齡趕緊剿辦今長齡屢次將高二馬五等股
截擊何以未見慶溥會同剿辦亦著長齡遇便查
奏鄉勇頭人武童王定富朱上錦首先衝入賊隊

被害著咨部照把總陣亡例賜卹侍衛呢瑪善驍
騎校阿穆昌阿佐領忠福委官青山外委曹正榮
均打仗受傷今皆愈否並著長齡查明保奏遇有
應陞之缺陞用

上又命軍機大臣傳諭吳熊光曰據額勒登保奏賊
首徐添德曾芝秀並張添倫等股匪衆俱經竄入
川境祇有龍紹周二馬五王廷詔等逆尙在陝

楚交界遊奕經額勒登保督飭慶溥長齡奮力截
擊本日又據長齡奏將各股賊匪痛加剿殺殲擒
一千四百餘名賊匪被官兵擊敗勢已窮感自可
無虞他竄其在湖北竄擾之藍黃白線四號賊匪
亦已逼歸川境是豫境西南兩面防堵事宜現非
著重吳熊光離省日久藩司馬慧裕業已擢用湖
南巡撫不日卽應前赴新任臬司完顏岱亦在邊

界防堵省中並無大員吳熊光應卽回省辦事至
該省江防現在尙非緊要並著吳熊光酌量情形
於防守官兵鄉勇內有可以裁撤之處卽當量爲
減去以歸核實

二十五日

甲戌

上命軍機大臣傳諭陸有仁曰陝省各處軍營剿捕
賊匪屢有克捷正當喫緊之時所需餉項自應寬

爲籌備但昨據額勒登保奏各股賊首徐添德曾
芝秀並先經奔竄之張添倫辛聰魏棒棒顏勝可
戴家營等股俱已逸入川境祇有龍紹周王廷詔
及高馬冉張等逆尙在陝楚交界游奕已令阿哈
保等帶兵二千餘名先行入川額勒登保不日亦
當帶兵赴川督剿陝省防堵之兵僅有三萬名較
前減少用項自可大加節省今特於山東江西二

省封貯銀內共撥銀五十萬兩先令解陝足資十
一月之用倘屆期尙有不敷不待伊等奏請自當
豫行陸續籌撥無虞缺乏陸有仁務須加意撙節
事事核實辦理勿令稍有糜費

二十六日乙亥明亮倭什布奏言查藍黃白線四

號賊匪雖經臣等剿敗竄回川省大寧地方離

楚稍遠尙有剿敗餘匪或數十人或百餘人分

起總在界嶺一帶假扮難民冒充鄉勇希圖混
入卡隘經前派叅將全祿守備孫鈇等帶領兵
勇分投剿捕并續派守備王占鰲首領黃興隆
等帶領兵勇入山搜捕節次擒獲葉萬全等一
百七十三名陸續解到臣等逐加細訊僉供四
號賊匪逃到川省地方因無糧食可掠令我等
裝扮難民鄉勇探聽官兵信息並詢出放火賊

丁奉等五名係黃白二號執旗賊目帶領百餘人前來到處放火擄人誘大兵追入山內卽合力轉回撲卡等語當將該犯等凌遲葉萬全等一百十三名均係從賊日久卽行正法其餘馬士貴等五十五名實係被擄良民概予寧釋復據叅將全祿探報一股賊匪約千餘人不知姓名由招峰巖一帶滋擾竄至柳葉店乘夜偷撲

營卡經守備孫欽等在山頂卡內望見因該處地勢陡險未許兵丁施放鎗礮待賊匪上至半山卽令衆兵滾放擗石斃賊甚多該匪當卽敗退由長城壩奔回四川大寧屬之通城坡一帶

臣等連日分派兵勇四路偵探四號賊匪均已

遠遁餘匪搜捕淨盡楚省西南邊境添設兵勇飭令嚴密防堵斷不可因賊蹤已遠稍有疎懈

正在布置間接得長齡來信已由鮑家店抄至

賊前獲有勝仗在瑪瑙溝紮營遏其東竄之路

并飛咨鎮臣德昌就近在黃龍灘扼要堵截但

賊匪狡詐異常路途分歧兵力不能周顧等因

又據竹山縣范繼昌稟報高馬二逆賊衆已竄

至白河屬之平頭山漫營等處切近楊家牌樓

翻越山嶺卽係竹山吉陽關地面相隔不過二

三十里賊勢甚緊請撥兵截剿等語

臣

查該匪

所竄路徑北有大江阻隔東有長齡帶領勁旅

截擊又有德昌在黃龍灘堵禦勢必奔竄竹山

西北邊境設賊匪一經闌入上通竹谿下達房

保深爲可慮是以

臣

等趕緊於十三日帶兵由

豐溪石板河雙竹園兼程馳赴竹谿并派兵勇

星夜迎探賊蹤相機截剿復飛咨長齡德昌合

力夾擊以期上緊掃除臣等於十六日趕抵保

豐隨據首領黃興隆等探報賊衆大隊在陳家

河屯紮賊探已至鐵掘寨溢水一帶焚掠卽於

十七日五鼓發兵已刻各路官兵馳抵溢水正

遇賊衆大隊該匪遙見官兵馬步賊衆分爲數

隊各佔山包吶喊搖旗蜂擁而來臣等察看山

勢散漫必須分路抄截方能制勝遂派副將吉

林泰朱士奉王懋賞等帶領兵勇分佔左右四

道山腿臣明亮督率侍衛富翰塔津保恒坤雙

福等帶領馬隊由中路迎前直擊臣倭什布督

率副都統銜總管托爾托保侍衛花尙保等由

山後抄上山頂分路下壓分派已定官兵同心

努力鎗箭齊發立斃馬步賊匪百餘人該逆等

捨命衝撲正在攪殺之際臣倭什布督率兵勇

繞上山頂分投壓下賊始慌亂官兵合力圍剿

斃賊三百餘名賊卽四散敗竄官兵追賊三十

餘里至獅子溝地方沿途又殲戮賊匪二百餘

人生擒男婦二百三十四名口乘間投出被裹

男婦老幼九十六名口奪獲大礮四尊鳥鎗一

百二十四桿騾馬七十三頭匹大小旗幟三十

一面沿途拋棄幼孩米糧包裹不計其數官兵

追殺一日暫令歇息一面派撥幹練兵勇跟蹤偵探當將獲犯細加審訊據賊探曹建成張明等供稱賊營內祇有黃藍二號藍號大掌櫃是馬五高二黃號掌櫃是王元帥賈元帥不知名字營內男婦大小共有六七千人王元帥管領馬隊賈元帥管領鎗手黃號先與白號合營後與白號分夥纔與藍號合營前在陝西漆樹溝

被楊大人打敗他們商量說湖北兵少可以到
彼搶掠衣食不料又遇官兵老師傅令我等來
探信今被拏獲不知他們向何處去等語并訊
出執旗賊目吳昌茂等十七名又領馬步賊匪
小頭目徐魁等二十一名均立行臠割其盛貴
等八十六名訊係馬步打仗矛手概行正法又
據曹月發梁何氏等共一百十名口僉供實係

昌在黃龍灘實力堵禦臣等隨時互相咨會惟

有併力同心務將高二馬五大股賊匪卽在楚

陝邊界剿除淨盡此次打仗攬殺之際守備韓

瑛身受矛傷二處尙不甚重千總職銜首領章

景龍竹山營外委梁大成均受矛傷陣亡并有

鐵角寨寨勇首領陳紀見官兵打仗率領寨民

二百餘人助陣殺賊亦受傷陣亡其餘兵勇間

有傷亡另行查明各部并將實在打仗出力各員開寫名單進呈伏祈

施恩鼓勵實於剿賊有裨奏入

上命軍機大臣傳諭倭什布曰黃白藍線四號剿敗餘匪在界嶺一帶假充難民混入卡隘經叅將全祿等帶領兵勇分投搜捕並將竄擾柳葉店之賊匪擊退此係全祿等剿辦出力至高馬二逆在鐵

掘寨溢水一帶焚掠則係倭什布明亮督率官兵

馳抵該處派委將領分路抄擊共殲擒賊匪八百

餘名所辦尙好倭什布前因不能攔截川匪致令

逸入楚境是以降旨將伊翎頂革去今能親率兵

勇繞上山頂分紮下壓痛加殲戮頗知奮勉伊係

本省巡撫頂戴乃觀瞻所係著先賞給四品頂戴

俟再有出力之處不但給還原品頂戴花翎並當

加之懋賞明亮於徐添德竄陝時以川省藍黃白
線四號賊匪竄楚緊要爲詞並不跟蹤追剿及四
股竄匪折回川境又駐劄豐溪以防堵竄匪爲詞
兩次俱未追賊出境是以革去總兵降爲藍翎侍
衛今自知愧勉奮勇殺賊著加恩賞給三等侍衛
作爲領隊大臣幫同倭什布在楚境堵剿遇有奏
事著倭什布單銜具奏明亮不必列名伊二人前

經獲咎今一知奮勉朕卽立予恩獎不可不倍加
感勵也外發去洋玻璃盒翎管撥指套日晷各五
件分賞出力將弁又發去一兩重銀牌五百面五
錢重銀牌五百面賞給此次打仗出力官兵用示
獎勵高二馬五一股在賊匪中最爲詭詐兇悍今
摺內以此賊現在捨命奔竄無多伎倆未免稍存
輕視倭什布明亮當益加振奮隨時留心設法抄

截卽在保豐一帶將高一馬五擒獲戮割致祭從
前被害提鎮等以慰忠魂但又不可因首逆旣擒
卽置餘匪於不問必須殲盡此股餘匪方爲伊二
人之功若稍有遺孽未淨卽不得謂之歲事萬一
賊匪一時未能剿盡或又竄往陝境現有長齡在
彼跟剿明亮不必前往卽在湖北與倭什布實力
防堵毋使再行闖入至藍黃白線四號餘匪雖現

在竄入川境但恐經德楞泰等剿捕緊急或又折
回楚省所有該處防堵事宜卽責成叅將全祿等
實力守禦不可稍有疎懈所有此次打仗陣亡之
千總職銜首領章景龍竹山營外委梁大成俱著
咨部賜卹其寨首陳紀殺賊陣亡著咨部照把總

例賜卹

同日

上諭內閣曰明亮等將軍營出力人員開單進呈總
兵孫清元著賞給騰柯特依巴圖魯名號乾清門
頭等待衛富翰賞給多克慎巴圖魯名號二等侍
衛雙福賞給愛木希克台巴圖魯名號仍照例均
各賞銀一百兩馬甲飛濟保著賞戴藍翎以示鼓

勵

二十九日

戊寅

長齡奏言

臣

於本月十二三四等

日自鄖縣之葛藤埡進剿生擒僞先鋒鄒順等
殺斃匪衆一千餘名賊衆狂奔西南陳家河一

帶查該匪若往南行則由江西溝鄧家寺溢水

塘向西則由東川保豐均可竄渡堵河繞赴房

縣東竄臣卽由關口觀音寺水磨河一帶繞截

行抵了角山據兵勇探報賊衆於十七日早直

奔溢水塘適值明亮倭什布自竹谿帶兵迎探

前來不期而遇迎頭截剿大得勝仗該匪已折

回敗逃

臣

卽折向西馳截擊匪衆又見勁旅緊

追萬分披靡鎗箭到處無不應手立斃其翻山

滾巖者不能計數拋棄器械騾馬幾滿道路被

裹良民紛紛而出隨給路票均各釋回本籍該

匪情急卽分兩股一向西奔現有明亮倭什布

帶兵窮追一向北竄

臣

偵探已向馬鞍橋吉陽

關一帶總於山僻小路奔逃並不焚掠

臣

卽抄

道繞出界嶺於十九日午刻趕至白河之東西
壩地方追及賊蹤該匪正在覓食實不料官兵
突至旋佔險窄山梁並樹林房屋內埋伏抗拒

臣

見該處山勢險窄路徑錯雜林深樹密若直

前衝擊必墮并計當派叅將馬德舒雙福等各
帶步兵鄉勇頭人武舉賈學魯行營千總賽廷

彩等各帶健勇分頭迎敵另派章京常泰等率領吉林黑龍江馬隊由旁通之路擇其稍爲平

坦者繞出賊匪之後使該匪前後不能相顧可

期痛洗臣帶領侍衛特依順保等督率兵勇從

山溝內抄向賊匪之前衝擊該匪等分投下壓亂石如雨我兵奮勇搶上山梁立斃執旗賊目一名餘賊七八十名該匪抵敵不住退避山後

我兵馬步兵勇三路或擊其前或斷其後或從中壓鎗箭並發斃賊三百餘名生擒活賊矛手七十一名訊俱正賊當卽正法餘匪翻山越嶺不擇路徑亡命奔逃仍向西北狂竄查該匪去向係白河洵陽一帶臣現由楚省界外緊躡追蹤一面飛咨明亮倭什布在楚省界內攔頭截擊內外兩路並進不予片刻之暇兼顧東竄道

路以絕其再折回楚之計如能趕至前途與明
亮等會合夾擊一鼓殲除固屬仰賴

天威卽或逼入陝境暫且肅清楚省似於剿捕稍有
裨益此次傷亡兵勇容俟查明另行咨部奏入

上命軍機大臣傳諭長齡倭什布明亮曰長齡前在
王家坪鮑家店大坪等處連有克捷此次帶兵繞
截竄匪復於溢水塘迎頭剿殺並趕至白河之東

西壩地方躡蹤追擊官兵奮勇搶上山梁斃賊三百餘名生擒矛手七十一名自因吉林黑龍江勁

旅勇往得力用能屢得勝仗所辦尙好現在賊匪向西北分股奔竄長齡由楚省界外帶兵追躡并飛咨倭什布明亮在楚省界內截剿此二股賊匪自卽係高二馬五分股該二逆屢次戕害提鎮大員最爲可惡今被官兵剿急分竄必須速行殄滅

淨盡著交長齡倭什布明亮三人分投夾擊乘勝
奮剿一經殲擒賊首卽遵照節降諭旨將首級祭
奠破害各員但必須將此二股匪黨悉數殲除勿
留餘孽不可祇擒賊首卽爲完事至長齡等三人
分剿此二股竄匪不拘何人先行剿竣一股卽帶
兵歸入一路併力協剿統俟此二股全行辦竣倭
什布明亮仍赴楚省邊界督率防堵長齡應赴何

路剿辦之處聽候經畧調度再長齡現向西北一
帶追剿賊匪而經畧額勒登保在紫陽安康一帶
紮營督剿相距不遠長齡豈有不得信息之理何
以摺內未據奏及此後奏報之摺應探明經畧一
路情形一併具奏

欽定剿平三省邪匪方略正編卷二百十三

庚申年

十一月初一日

已卯

長麟慶成奏言竊

臣

長麟由

鎮安安康一帶馳抵漢陰接額勒登保來信知

額勒登保由西鄉王黑壩一帶東移已入紫陽

境內囑

臣

不必繞道紫陽卽就近趕赴西鄉與

慶成面籌防堵事宜

臣

卽由漢陰起身趕抵石

泉途次接據探報伍懷志股匪原有一千餘人

經穆克登布等在鐵鑪川一帶節次剿殺之後
僅餘五六百人於初二日翻越老林竄出留壩

廟臺子棧道桑吉斯塔爾緊躡追剿穆克登布

由江口抄截該匪由葦子坪北奔桃號二川因

臬司王文湧都司綽克圖帶領兵勇在方柴關

堵剿該匪仍卽折回楊家溝腦初七日午刻遁

入南山內之佛保寺桑吉斯塔爾趕上賊蹤極

力掩殺斃賊二三十名生擒六名該匪情急奔
入洞溝腦連夜走紅巖溝青草山一帶十三日
竄至葦子壩內鐵冶河華陽山一路奔逃穆克
登布抄至石塔寺截住賊匪殲賊三十餘人生
擒戰手十餘名均卽正法餘匪不過四五百人
竄入西溝穆克登布截殺二十餘名賊匪翻上
大山絕頂桑吉斯塔爾穆克登布等現在合兵

由九齒壩截擊又經額勒登保添派總兵汪啟
及候補通判雒昂等在四畝地鐵爐壩等處堵
截所剩賊匪僅四五百人三路兵勇七千有餘
無難就地剿滅又觀祥游棟雲由畧陽追剿小
股賊匪逼過漢江追至螞蝗溝殺賊一百餘人
生擒二十餘名餘匪由大小沙河竄入廣元境
內雖已逼出陝境然尙在邊界老林內游奕未

經遠去又連日據南鄭城固西鄉等縣稟報川
匪一股於十三日由花石梁竄至城固之小盤
壩同日又有川匪一股由螞蝗溝竄至西鄉之
鍾家溝又有一股賊匪於十八日由南鄭之法
慈院竄至旗桿山板倉大壩一帶又有一小股
竄至西鄉之細辛壩各等情均經臣慶成與恒
瑞及楊奎猷胡定泰等并臣長麟札催觀祥分

兵截攔業已先後逼出陝境但亦仍在界嶺一

帶老林內游奕尙未遠去且據探報尙有賊匪

數股在通江之烏林埡方山崖雄埡子及南江

巴州接壤之兩河口等處潛匿希圖乘隙北竄

陝境是現在南鄭西鄉寧光西縣一帶最關緊

要臣長麟即趕緊由洋縣城固前往相機堵截

於二十日行抵洋縣適臣慶成亦因截剿賊匪

路過洋縣與

臣

長麟會晤熟籌防堵之策查西

鄉南鄭等處自軍興以來節年堵禦而從無一

次堵住者實緣川陝連界之處自寧羗以至西

鄉袤延幾及千里中隔界嶺一道界嶺之上路

徑叢雜隨處可通且賊匪鋌而走險官兵祇能

於可通路徑之各要隘分設卡座零星散布而

賊匪於並無路徑各處攀援衝突無論各卡官

兵均屬鞭長莫及即使趕往堵禦倉猝之際賊

匪以全力攻撲亦難望其必能得力一經闌入

再無截剿之兵遂至肆行奔竄深入蹂躪甚至

有前股之賊翻山竄過勢須暫撤卡隘官兵前

往截擊而後股之賊卽由暫撤官兵之卡隘乘

虛衝入以致官兵前後不能兼顧此節年未能

堵住之情形也此次堵禦必須先以從前節次

覆轍爲鑒不宜過分兵勢除於實在要隘處所
按設防兵外仍須於每縣適中總要處所酌留
剿兵俾得堵禦截剿兼施縱使賊匪翻山越入
衝過卡隘尙有剿兵可以迎頭截回庶不致再
如從前之紛紛深入查額勒登保派留陝省官
兵除額勒亨額慶溥喜明在東路剿辦及關騰
劉之仁分防江岸所帶官兵外其餘可以調來

西鄉南鄭寧羌沔縣等處防堵者不過萬有餘
名此內尚有前在棧道防堵已調未到者亦有
現在堵截伍懷志賊匪不能遽行撤調者又派

留西鄉南鄭等處之領兵大員內如提督定住
因前在階州剿賊墜馬觸損舊傷力疾行至寶
雞不能動履暫留該縣調養茲據寶雞縣稟報
定住病勢日加沉重難冀速痊德忠現已奉

旨拏問汪啟亦因截剿伍懷志賊匪未能撤出是刻

下官兵尙未齊集若卽以現有兵力堵剿兼施

一經分布卡隘則防兵之外不能再留剿兵卽

防兵亦未免尙形單弱仍屬於事無益臣等熟

加商酌惟有與恒瑞等就現在已到之兵分擇

各縣適中之地扼要駐紮遠探賊蹤何處緊要

卽趕赴何處截擊暫且以剿爲堵仍彼此聯絡

聲勢盡心竭力斷不令賊匪深入俟各路官兵
調齊之日再行分布卡隘堵剿兼施益臻嚴密

奏入

上命軍機大臣傳諭長麟慶成日長麟等遞到六百
里奏報朕以爲必係打仗得勝情形及加披閱祇
係籌商陝省南面一帶堵禦事宜旬日以來所辦
何事怠玩故態復萌矣其伍懷志一股遁入南山

實爲可恨此股剿敗餘匪現據摺內稱經穆克登
布等節次剿殺之後僅餘四五百人而兵勇共七
千有餘較賊多至十倍何以不能設法兜圍尅日
剿淨或桑吉斯塔爾穆克登布以剿盡此股賊匪
又須另往他處故爾養寇遷延卽伊等稟報極力
掩殺之語恐亦不免虛捏焉有兵勇數千剿賊數
百名可謂極力掩殺乎長麟慶成務當嚴行督催

速將伍懷志一股迅卽辦竣俾漢江以北一律肅
清若有怠玩之處卽行嚴叅治罪不值因此股殘
敗賊匪牽綴數千兵勇也至川省竄匪經德楞泰
勒保屢次剿敗且該處築堡團勇諸事認真辦理
賊匪無可搶掠俱不願回川德楞泰勒保帶兵總
由西南向東北逼壓賊匪非東入楚省卽北竄陝
境該省防堵事宜係長麟慶成專責該督等務當

督率地方文武實力堵禦雖川陝連界之處自寧
羗以至西鄉袤延幾及千里然其中必有扼要之
地若以道路綿長處處排列官兵不但此時無兵
可調卽再增兵數萬亦不能到處分佈長麟慶成
總當於扼要處所安設卡隘聲勢聯絡以剿爲堵
毋使川匪一名闖入倘有疎虞惟長麟慶成是問

初二日

庚辰

額勒登保奏言竊

臣

先因紫陽境內

有數股賊匪出沒旋於十四日自王家臺起營

由月池溝山梁及王門壩等處前進十六日晚

間探有賊匪在婁家溝屯劄相距只二十餘里

正擬稍爲停息卽發兵剿擊孰料該匪一聞官

兵將至乘夜逃竄十七日自雙和塘一帶追入

斑鳩關日暮時見賊匪上對面山梁臣當卽督

兵下溝上山趕剿賊匪亡命奔竄所殺僅二十

四名林菁昏黑不能再進拏獲田大登張正萬
等十一名嚴加鞫訊內張正萬係探馬頭據稱
現在此一帶係冉學勝張世龍及龍紹周苟文
明股匪因川省不能掠食故又陸續越過界嶺
前來或分或合意欲東竄餘無要供當將該犯
凌遲處死其餘訊係實在賊匪亦卽正法次日

臣
仍卽親督官兵帶同札克塔爾喜明分路旋

探旋進至曹家壩入道河黑灘溝一帶賊又乘

夜由老林分逃一股向六道河鐵佛寺繞溪河

等處西南逃竄一股向安康界內小道河鐵爐

壩東竄我兵趕往殺斃賊匪三十餘名拏獲活

賊劉世富等十六名臣察看此一帶山大林密

溝澗深狹賊匪隨處潛躲莫測所向馬步官兵

實難施展該逆旣已分遁自應先顧東面且查

紫陽以西有額勒亨額帶兵在瓦房店扼要堵

截西鄉一帶有慶成在彼安設卡隘長麟并亦

帶兵至西鄉與慶成商辦防堵其所撤之防兵

亦俱陸續可到向西南竄去之賊可以不致蔓

延惟東竄賊匪漸近平利必須趕緊剿辦臣於

二十一日繞抵安康之木蘭橋接得長麟自楚

來信於鮑家店地方將高一馬五之賊痛加截

剿斬獲甚衆計算該匪等屢被長齡剿殺兵威

已震此外尙有明亮倭什布攔截如不敢深入

楚疆又必折回陝境臣刻下自磚坪一帶追賊

而進并聞楊遇春等帶兵在孟石嶺獅子壩剿

賊適當東面臣卽飭知加意堵截期與臣夾擊

殲除如長齡所剿之高二馬五股匪西折亦必

卽奔平利該匪最爲狡猾倘現在東去之龍紹

周苟文明等或與合夥則人數較多長齡所帶
官兵卽與慶溥會合力量尙單臣到時務當相

機趕剿與長齡等將此數股賊衆合力洗盡庶

楚境廓清再移師西向專辦川陝邊界各股賊

匪較易爲力再查總兵觀祥副將游棟雲所剿

零星賊匪被該鎮等在八廟莊螞蝗溝等處先

後剿殺所剩祇百餘人據報鑽遁老林奔七眼

洞已近川界仍派鄉勇入山搜捕現在沔畧境

內肅清又接據穆克登布稟報所剿伍懷志股
匪屢經剿殺人數實已零落僅有四五百人總
向箐林深山穿越十六七等日趕至洋縣石塔

寺紙廠等處殺賊三十八名生擒十六名訊無
要供亦卽正法是伍懷志股匪已成釜底游魂

臣

亦分飭該鎮等鼓勵兵勇竭力搜剿不可再

有延緩看來各股賊匪東竄西奔不出陝之南
鄭西鄉紫陽安康及川之太平南江通江川陝
交界萬山層疊密林深溝之處尙易藏匿然川
省德楞秦勒保已在緊剿而長齡慶成又在川
陝邊境設防堵截臣若於安康平利境內仰仗
天威將數股賊匪辦竣實爲至幸或有剿潰餘孽亦
卽逼向西南竭力籌辦將來各路官兵雲集愈

逼愈緊該匪等亦斷不能苟延時日矣

額勒登保又奏言竊江南提督定住前來軍營

在陝省孟家灘帶兵剿賊卽有失利臣因其甫

到營中不熟地勢且行軍勝負亦所常有曾以

好言勸慰嗣經派在甘省同廣厚帶兵截剿賊

匪因廣厚熟悉地勢故令合爲一路及查節次

所殺賊匪不過一二百名散賊臣當卽以廣厚

究係文職而該提督係武職大員自應率領將
備身先士卒不得稍事因循再三剴切札知其
後亦未能痛剿賊匪臣念其久任提鎮究係熟
悉營務於甘省肅清後飭令帶兵前來陝中設
防堵剿並以固原提督賽冲阿在川不能到任

奏懇

聖恩令其暫行署理以便辦理各事呼應較靈旋據

該提督報稱行抵寶雞因在甘省剿賊於波羅山踰嶺陟險乘馬滾巖壓傷左腿並稱昔年出

師金川原受鎗傷此次墜馬跌壓舊傷并發不

得不於寶雞暫住就醫等情臣又卽行文該提

督如緣舊傷復發不便乘騎不妨卽坐兜椅來

至漢中一面接管印務并辦防剿事宜去後該

提督竟不前來漢中茲接其來信聲稱自揣不

能勉強請^臣 另爲揀員奏署^臣 伏思帶兵大員

偶有傷病等事自應調治就痊再行盡力剿賊

該提督因墜馬跌傷并致舊傷復發亦在情理

然究係外病調治可愈何至不能行動且該提

督本係旗人當此軍務喫緊理應分外出力乃

似此延玩若人人效尤又藉何人辦理且該提

督既不署理固原提督又豈能勝江南提督之

任應據實具奏或令定住解任回旗調養或子
革職之處伏候

欽定所有固原提督印務賽冲阿未經到任之先應

請

旨交慶成暫行兼署再_臣前以陝安鎮總兵柯藩在

山陽防守不能截剿賊匪具摺奏奉

旨將柯藩革職卽于軍營枷號俟軍務完竣之日再

行發往伊犁臣隨卽遵

旨在於鎮安適中之地將柯藩柳示在案臣近日統

兵來至紫陽安康一帶該處寨長民人等均來

謁見無不以柯藩爲念並稱該鎮在任時帶兵

殺賊約束官兵甚嚴從無累民之事臣伏思柯

藩係屬武職於小民本無關涉今臣所過之處

嘖嘖稱善其平時之馭兵愛民可以概見臣從

前因其不能截擊賊匪有干軍紀不得不據實
叅奏茲柯藩旣爲此間百姓愛戴不敢壅於上
聞可否仰懇

皇上格外天恩將柯藩釋放令其在紫陽安康一帶

隨同額勒亨額辦理堵剿并團勇結寨事宜以

贖前罪倘果著有成效再行請

旨酌量施恩均奏入

上命軍機大臣傳諭額勒登保曰額勒登保自上月
二十二日奏到酌籌各路剿賊情形後又閱十日

本日遞到奏摺以爲必係打仗得勝或剿滅賊股
及加披閱則仍係籌剿各股賊匪緣由而摺內惟
稱現督官兵旋探旋進及至趕上賊匪而賊匪已
乘夜分逃總未痛加剿殺試思各股賊匪見有官
兵追躡豈有不先行逃竄之理額勒登保自應察

探賊情設法佈置或於要隘處所派兵堵截或抄
赴賊前迎頭攔擊方可得力若趕上賊匪又任向
前逃竄似此東奔西逐徒疲兵力何日始能辦竣
現在氣候日就嚴寒在地雜糧包穀等項均已收
割官兵則有衣履可以禦寒糧運可以充腹而賊
匪旣無食可掠卽逃入山內亦焉能有口食接濟
且輾轉奔竄衣不蔽體焉能當此嚴寒是以飽騰

之士馬剽此飢疲之竄匪天時人事實惟此時最

爲得力設再有遷延一交春令則氣候日就和暖

南方耕種較早轉瞬青苗遍地賊匪又可隨處掠

食剽辦必至費手額勒登保豈可不乘此機會趕

緊奮擊尅期歲事若能於年內將各股賊匪悉數

殲除不留餘孽捷音奏到朕必格外施以重恩卽

不能一律剽淨或將大股賊匪於年內殲除辦定

大略其餘零星匪黨以次分投搜捕尙可謂之有
功若至歲除時仍與現在情形無異則辦理濡遲
雖有功亦不足錄試思剿辦賊匪將及五年朕未
親政以前姑置弗論卽自上年至今辦理亦已二
年賊匪一日未淨則地方一日不安荼毒生靈不
可勝計而糜費國帑猶其小者且以內地亂民頻
年剿捕不能竣事何以宣示國威而朕受

皇考付托之重曷由仰慰

在天之靈若屆明歲釋服時軍務未竣亦難另簡大員

復行督辦朕惟有親統六師用申撻伐則帶兵大

員等之罪更何可言額勒登保實爲罪首將來有

何面目見朕耶此語實不忍加之汝身然時勢相

催亦無可奈何自額勒登保任經畧以來朕節次

添兵添餉不知凡幾更不得諉之兵少糧乏且舉

劾人員一經奏到無不照所請行從未駁飭卽如
現在所奏柯藩定住二員俱照擬辦理卽他人陳
奏亦多有交伊查核虛實者是信任不可謂不專
事權不可謂不重更有何掣肘之事有誰爲從中
阻撓之人乎額勒登保數月以來經朕疊加訓飭
頗知奮勉近日又似漸形延玩矣凜之慎之至高
馬三逆最爲可惡卽額勒登保亦知其狡猾異常

尤應卽時撲滅據稱該二逆現已西折或與東去

之龍紹周苟文明合夥長齡等兵力較單額勒登
保卽當相機趕剿合力洗淨等語自應如此辦理

若高馬二逆竟與龍紹周苟文明合夥亦不足慮

賊匪分股奔竄官兵卽須分路追剿往往爲賊牽

綴卽如伍懷志一股經官兵剿殺之後僅餘四五十

百人而兵勇轉有七千餘名在彼剿辦是其明証

今高一馬五等如果與龍紹周苟文明歸入一夥
正可聚而殲戮况各股賊匪東折西奔皆祇在陝
之南鄭西鄉紫陽安康及川之太平南江通江一

帶而各路俱有官兵設防堵截似此潰竄之賊無

難乘勢剿殺迅速戴功額勒登保當此事屆垂成
之時不可稍有疎懈致失機宜至定住前在陝省

孟家灘帶兵剿賊既有失利之事彼時額勒登保

卽應據實叅奏何以隱忍不言直至此時始於摺
內畧爲敘及昨據長麟奏定住現在患病沉重已
有旨令其來京其固原提督之缺早經降旨令慶
成暫行署理今據額勒登保奏定住因在甘省剿
賊乘馬滾巖壓傷左腿舊受鎗傷復發屢經札催
總未前赴漢中著額勒登保傳旨飭令該提督緩
程來京候旨倘傷患不重藉詞諉卸有意抗違卽

應據實叅奏將定任留於軍營聽候查辦至柯藩

前在陝安鎮任內帶兵駐守山陽城外不能截剿

竄匪經額勒登保叅奏是以將伊革職先在軍營

枷號俟軍務完竣再行發往伊犁茲復據奏近日

統兵至紫陽安康一帶查知該鎮在任時尙能馭

兵愛民等語柯藩著加恩釋放枷號作爲兵丁在

紫陽安康一帶隨同額勒亨額辦理堵剿并團勇

結塞事宜以贖前罪並著額勒登保留心察看如
果奮勉再行奏明酌量加恩倘仍前怠玩卽據實
叅奏必當加倍治罪

卷之六

一、

二、

三、

四、

五、

六、

七、

欽定剿平三省邪匪方略正編卷二百十四

庚申年

十一月初六日

甲申

德楞泰勒保奏言竊

臣

等於

本月初七日行抵清花溪據報由陝竄來高家

營內顏楊二姓之賊自太平官渡灣被兵勇擊

退又從簡池壩闌入通江界內龍紹周與唐冉

餘孽俱由高頭壩折竄陝境老林維時太平境

內已無賊匪

臣

等查簡池壩距清花溪不過四

站自應就近分兵先往剿辦惟楚省折回之賊

在巫山大寧邊界遊奕若一入雲開向萬縣新

寧等處奔逸恐腹地又遭蹂躪是以商定臣德

楞泰卽赴簡池壩一路進剿臣勒保取道新開

遏賊西竄初十日臣德楞泰甫至通江竹峪關

探知賊聞大兵前來卽連夜奔回西鄉辛子山

旋據通巴一帶文武稟報陝境之賊又折回數

股經劉清徐廷鈺等派令縣丞職銜劉炳從九

品徐若瀛帶領壯勇五百名並前在鮮大川夥

內投首之王登忠鞏貴趙思朝等十八人假扮

教匪模樣初四日在通江縣芝坪地方適遇楊

開甲之弟楊開第一股賊匪千餘人竄來王登

忠等詐稱鮮大川餘黨被官兵衝散情願歸附

同行楊開第令其暫紮邊營明日點驗劉炳等

恐被窺破卽於三更時先令王登忠等潛入賊營到處放火各壯勇齊聲吶喊直前衝殺黑夜中賊衆驚亂奔逃自相踐踏追殺五十餘里至烏林堦時已天明因賊匪遠颺不便再追統計殺死及跌斃賊三百餘名投出男婦周太鼎等一百三十七名口搶獲馬騾鎗礮刀矛旗幟甚多並據周太鼎等供稱楊開第尹老掌櫃俱受

傷棄馬而逃僞先鋒杜星貴已被戮死當卽指
認屍首屬實又據署巴州田文煦稟報初六日

有李炳陳朝觀股內分出賊匪至棗林地方乘

夜摸樁經署州判羅德嚴把總陳安邦等帶領

兵勇堵截密令前此投首之楊仕山鮮文屏等

帶人於四更時混入賊隊放火賊衆驚潰殺賊

三十七名撲水淹斃十餘名生擒耿貴等八名

至七十五一路官兵於初五日抵南江范家山探聞楊開第一股由陝竄來被通江壯勇擊敗

竄至關門子與辛聰齊國謨張添倫等股合夥

七十五卽連夜發兵進剿賊分兩路抵拒一在

溝內埋伏一在空山嶺山腰吶喊誘敵七十五

先派都司蒲佑盛等帶領兵勇進溝將伏賊搜

殺殲斃五六十人繼卽統領馬步隊搶上大嶺

追殺三十餘里至小寨地方共計殺死及滾巖
跌斃賊匪三百餘人生擒唐泳章等五十三名

餘向石觀壩竄去七十五又帶兵追躡十一日

戌刻抵麻柳灣賊在陳家峽屯紮相距不過十

餘里正擬五更發兵詎該匪等於二更後竟分

三路前來撲卡將鄉勇頭卡攻破又復圍擾副

將張良槐都司蒲佑盛營盤七十五卽帶兵奮

力轟擊斃賊五十餘名生擒十二名蒲佑盛左手雖受矛傷尙能悉力堵禦營卡得保無虞訊

據活賊鍾治谷供稱係李炳與張添倫辛聰等

商量如果此次偷營得手卽赴保寧一路欲過嘉陵江若不能得勝仍回陝西等語七十五於

天明後發兵追剿賊衆捨命狂奔分作兩股竄逸一由大小壩竄入陝境一由西河口折赴通

江^臣德楞泰聞信後卽星夜馳往截擊十五日

抵平溪壩正遇李炳等一股賊探十餘騎奔來

一見官兵卽踉蹌折竄經賽冲阿阿穆勒塔率

領頭隊馬兵趕緊追逐箭斃三名生擒五名訊

知李炳等因廣元南江一路官兵堵剿嚴密不

能竄出保寧張辛等逆已回陝境該匪欲由通

江至巴州儀隴等處竄往順慶可圖掠食^臣德

楞泰即由梓潼廟繞出賊前十八日辰刻至柳

林溪正值賊匪竄至我兵迎頭截住賊匪見兵

即逃由兩河口撲水過河官兵亦即跟蹤躡渡

趕剿一百二十餘里直追至西鄉之石虎壩共

計殲斃賊匪二百三四十名淹斃者亦多生擒

曹繼開等一百十三名據稱鎗斃賊目楊總兵

不知其名臣德楞泰本擬即向陝境追去緣接

臣勒保知會楚來之賊已由開縣遁入太平楚

省旣無兵追來自應先顧其急且川北境內現

無賊匪當卽札會七十五令其在通南邊界扼

要暫紮探明何處賊來卽赴何處截剿臣德楞

泰卽帶兵直趨於二十二日至八台山後槽地

方與勒保會合至臣勒保自清花溪分兵以後

十一日趕至新寧途次接據總兵永寧託雲泰

稟報湯思蛟劉朝選等所剩三百餘人遁入老林由紅池壩至南天門一帶竄遁該鎮等追至

核桃壩據報後路徐家壩有楚省竄來大夥匪衆恐腹背受敵卽帶兵轉回初三日巳刻至徐家壩匪衆正在起營該鎮等卽分兵兩路追襲殺賊一百三四十名生擒李潮元等三十五名

訊係黃白藍三號及樊人傑一股合夥竄回惟

線字號張姓賊目一股被馬兵衝斷未來該鎮

等正在追趕之次又據大寧場鹽大使米喬齡

專差前來告急附近鹽場之舌條嶺隘口有賊

一股由楚竄至經都司沙念聖帶兵擊退賊又

從西溪河竄來距場不遠必欲暫請赴場截剿

該鎮等以大寧鹽場烟火萬家未被賊擾今賊

竄將近未便置之不顧當卽密派叅將田朝貴

馬應國抽帶兵勇千名在百六溪硎口埋伏賊
果由此竄入我兵鎗一石並發斃賊七八十名餘
衆驚退卽由界嶺折回永寧等仍卽帶兵西來
追剿樊逆等夥之賊查該匪等自大寧尖山壩
竄出沙沱子經雲陽開縣兩處團勇截殺殲獲
二三十人至十餘人不等復由羊子嶺大梁等
處竄出十二日至開縣之大旺山正欲從臨江

市奔竄新寧至梁墊一帶滋擾適遇

臣勒保帶

兵趕到賊卽連夜由燈草壩竄入東鄉之土黃

壩我兵卽取道普光寺迎截賊又折竄太平鞬

轉奔逃十九日永寧託雲秦之兵適由溫湯井

一路來至白沙河

臣勒保亦到該處探知賊在

天池壩屯紮卽連夜分兵三路進剿該匪等恃

其人衆直前抵拒官兵左右衝擊相持兩時之

久鎗箭所到斃賊六七十名並射死執旗賊目
一名賊始潰遁俱奔上八台山我兵乘勝追殺
直至後槽地方沿途殺死賊匪二百餘名生擒
廖貴等一百零四名訊據供稱白號樊人傑王

谷賢黃號徐萬富藍號王士虎並線字號張元
帥不知其名自到湖北去後在遠安地方與李
大人官兵打仗得勝原想到荆襄一路因聞湖

北新到馬兵利害不敢下去就在遠安竹谿房
縣一帶摸樁擄人在上龕地方忽被馬兵趕來
衝殺樊人傑等卽連夜逃至川境惟線字號衝
斷未來樊人傑等商量本要由新寧梁山一路
下壩過嘉陵江因到開縣觀音山聞大兵從新
寧前來就翻山過東太境內躲避等語當將從
賊日久之張有旺等六十八名卽行正法餘俱

被擄訊明釋放並據署城口主簿張雲漢稟報
張子聰之分股餘匪李德先從陝西敗回圍攻
楊家寨經該主簿督率團勇擊退擒獲僞總兵
汪固嘉次日追剿在三聖寨夾溝埋伏斃賊六

七十人奪獲馬牛十八頭匹又徐添德一股自

南溪竄入川境疊次攻撲城口之太和寨並經
該處團勇竭力抵禦鎗斃賊匪多名仍竄過陝

西漳河地方臣勒保因八台山之賊既竄後槽

其勢非奔開縣卽走城口正擬進兵追剿間臣

德楞泰趕到接據探報徐添德苟文明等有由

漁渡壩竄入太平之勢正可合力馳擊又據夔

州文武稟報自楚竄來後股線字號賊匪已從

大昌竄入雲陽沙沱子地方勢必又至開境臣

等現在商酌如果此股亦由太平竄來正可聚

而殲洗若西竄新寧必須分兵截擊斷不使該
匪又入川東再擾腹地致有蔓延上煩

慈厘

德楞泰又奏言竊臣於竹峪關營次奉到十月

初一日

諭旨跪誦之下敬畏悚懼不能自已伏念臣自統兵

剿賊以來未能迅奏膚功撫衷循省負咎實深

刻下軍務情形本無掣肘之事又安有窒礙難
言之隱乃荷

淵懷垂詢飭令據實益且陳臣益不禁欽佩感服之至

查川楚陝三省賊匪奔竄靡常自夏秋以來經
各路官兵悉力殲除十去六七此時股數雖多

但俱係敗殘餘孽臣勢皆窮蹙臣早與額勒登保

札商自以全數逼入川境爲正辦現在楚境之

賊俱已入川該省業經無賊正須全力責以堵

禦臣已飛咨姜晟俊什布務於川陝交界地方

扼要嚴防毋任東竄至陝境卽日肅清之後想

額勒登保自必將該省守禦事宜布置周密再

行來川督辦維時川境又添各路征兵專司剿

辦更易爲力查刻下川省現有征防兵勇共二

萬餘名出敵者祇有萬餘昨接額勒登保咨會

將阿哈保一路現帶官兵二千有奇撥令回川

並挑撥甘肅營馬數百匹前來足資濟用况陝

楚賊匪既須全逼人川是陝楚兩省重在堵而

不在剿川省重在剿而不在堵且查自廣元以

至巫山凡與陝楚交界之處綿亘三千餘里本

不能處處設防多則徒費兵力少則更不濟事

惟嘉陵江西岸必須添設兵勇遏其西竄至

臣

現與勒保在太平一帶籌剿川東邊界之賊恐
該匪等被剿情急又復東竄官兵勢難抄前迎
截查明亮一路之兵現奉

諭旨飭令赴川協剿刻下尙未入境自係該省防堵

事宜尙須會同料理臣現已咨會先將前撥李

紹祖帶去兵勇三千餘名撥出派員由大寧一
路管帶前來卽可就近迎截惟念陝楚之賊分

通入川陝楚之兵均必跟蹤追剿餉糧亟須豫

籌查川省糧運事宜辦理本覺妥速現經勒保

督率州縣臺站源源儲備並於各寨碕豫爲存

貯官兵隨到隨供從無缺悞卽或深入老林寨

碕希少不能處處充盈尙可設法籌辦惟餉銀

缺乏時形掣肘刻下川省軍需除兵勇月餉運

糧脚價等項之外實無絲毫浮費但需用旣多

勢難拖欠現聞司庫並無存銀先經勒保奏請

賞撥自邀

聖慈鑒察第念此後賊聚於川大兵雲集萬一用餉

不敷當此功虧一簣之時未免可慮緣蒙

垂詢用敢據實直陳臣具有天良惟知勉力帶兵殺

賊現與額勒登保交相勗勉儘力將川陝境內

之賊務於年內將大局辦完卽有一二未盡餘

氛尙須搜捕並酌辦善後等事總當於明春趕
前赴

闕廷瞻覲

天顏斷不敢稍有遷延自取咎戾均奏入

上命軍機大臣傳諭德楞泰勒保曰德楞泰勒保一
路軍營二十日來未見報到本日遞到六百里奏
報係於十月初四日發摺後直至二十三日始行

拜發前後實逾二旬且摺內所稱情形不過將楊
開甲餘黨等股夥匪殲擒多名仍未能辦完一大
股殄除一首逆而德楞泰所帶之兵亦未與賊接
仗並無可慰朕懷之處何必遲延多日始爲此奏
此二十晝夜焦急之懷實難言喻據稱德楞泰由
簡池壩一路進剿勒保由新開一路進剿伊二人
分辦之處朕早已料及但旣經分路剿辦何難各

行具奏乃必俟伊二人會合後始行聯銜奏報以
至遲延二十日之久不特朕朝夕盼望殷切卽內
外廷臣亦俱傳爲詫異况本年春間有賊匪偷渡
嘉陵江之事今德楞泰等奏報遲遲未至更易啟
猜疑伊二人何不曉事若此至摺內所稱各路兵
勇分投堵剿陝楚竄來匪衆不令闌入腹地並咨
會姜晟倭什布等於川陝交界扼要嚴防及嘉陵

江添設兵勇遏賊西竄所辦俱是但德楞泰等既

知與額勒登保札商將賊匪逼入川境爲正辦何

以張辛等逆又令其竄回陝境耶又所稱陝楚兩

省重在堵而不在剿所論甚是至川省重在剿而

不在堵之語尙未盡善川省各股竄匪自應痛加

剿殺但亦須邊界要隘防堵嚴密賊匪無從竄近

腹地漸逼漸緊方可剷除淨盡豈可令其在川境

散漫是川省固重在剿而亦兼在堵摺內已用硃
筆改正又另摺陳奏感悚情形多係無謂空言支
吾塞責德楞泰等既知感恩圖報伊等受朕之恩
尙淺受

皇考之恩甚重若不迅奏膚功使朕不能早慰

皇考在天之靈朕卽爲不孝德楞泰勒保尤爲不忠定
難辭罪至德楞泰現係一等子爵較伊原得封爵

已復其舊若遽心存自畫或以爲卽奮勉圖功亦未必再邀異數此則非是若德楞泰果能於年內迅掃賊氛必當加恩進爵倘辦理遲延不但伊現在子爵不能保全必當治以貽悞之罪至勒保則係屢經獲咎之人尤當倍加感奮伊等總須時時以殺賊立功爲急全不在鋪叙感恩悚懼之詞試思朕之所以加恩訓飭者豈徒欲伊等以虛詞覆

奏耶至經畧剿盡高二馬五自當帶兵入川此時
德楞泰等惟應併力一心無分畛域設法將賊匪
逼歸一處庶可收事半功倍之效再摺內稱陝境
折回之賊經縣丞職銜劉炳從九品職銜徐若瀛
帶領鄉勇並投首之王登忠等假扮教匪歸附賊
營又署州判羅德嚴把總陳安邦等帶領投首之
楊仕山鮮文屏等混入賊隊俱設計放火使賊匪

驚潰奔竄痛加殲戮此等機宜在投首之人尙能
設計誘賊何官兵計不出此况賊匪見官兵追剿
自必先行逃竄若僅事追逐徒勞無益必須設計

掩襲使賊匪猝不及防無從豫遁方可聚而殲洗

劉炳徐若瀛羅德嚴陳安邦張雲漢及投出之楊

仕山鮮文屏王登忠等誘賊出力著德楞泰先行

存記俟再有出力卽行奏請加恩至都司蒲佑盛

帶兵擊賊殲斃多名及至受矛傷尙能奮勇堵禦
不令衝破營卡甚爲出力著以應陞之缺陞用至
川省軍餉又已撥給成功在卽軍需自較增添朕
必當豫爲籌計不待伊等奏請但須搏節支用不
可稍有糜費亦不得過事苛刻致兵丁多有苦累
並著遵照前旨將剿賊情形隨時具奏以慰厯注

同日陸有仁奏言臣自省起程由棧道馳進經

過寶雞之東河橋黃牛舖鳳縣之草涼驛留壩

之南星廟臺子等處向來俱係熱鬧村鎮今盡

成瓦礫之場幸賊匪現已遠竄麥田又均經播

種出土青葱民心尙屬安帖

臣於途間接據洋

縣稟報伍懷志零匪一股由整屋小牛嶺竄至

該縣屬之華陽地方總兵穆克登布等帶兵兜

剿又沔縣稟報自川折回賊匪一股約七八百

人由寧羌西流河竄入沔縣之黃草坪老林內

總兵楊奎猷帶兵搜剿又南鄭縣稟報賊匪一

小股由城固五郎竄至該縣回軍壩距府城九

十里督臣長麟帶兵馳至漢中卽赴牟家坪一

帶堵剿又東路探報紫陽賊匪由許家河自連

橋一帶奔竄其安康香河賊匪由平利之泗郎

廟東奔漸近縣城又高二馬五股匪自楚省邊

界折回由洵陽竄至安康之蔣家河距興安郡

城八十里各等因

臣

查核所報情形洋縣華陽

之賊本只數百人日來勢更窮蹙穆克登布等

各路兵勇足敷剿辦其沔縣南鄭之賊亦俱係

殘敗餘匪長麟帶兵旣到漢中督剿總兵楊奎

猷又在沔縣截擊且恒瑞慶成又在西鄉之鍾

家溝關東山等處分布官兵嚴密堵截其勢斷

不能肆竄惟紫陽平利安康之賊人數稍多高二馬五又係著名首逆情形較爲著重聞經畧額勒登保已至紫陽之斑鳩關切近川界得信後自必折回督同楊遇春慶溥溫承惠等剿辦此時在陝之賊俱已漸近川界而在川之賊經德楞泰勒保帶兵緊躡追剿亦俱逼近陝境其楚省邊界之賊又經折回安康經畧大兵自應

留陝先將安康等處之賊以次殲除再移近川

界與德楞泰等隨地通知兩面夾擊似更易於

得手臣現卽馳抵漢中一面趕緊督運糧餉源

源接濟務俾士飽馬騰兵氣益增勇銳一面先

與長麟慶成會籌一切倘額勒登保大營移近

仍當馳往熟商總期和衷共濟早靖逆氛奏入

上命軍機大臣傳諭陸有仁曰洋縣沔縣等處敗殘

餘匪有長麟穆克登布等帶兵剿辦自必刻就殲
除其竄入紫陽一帶之首逆高二馬五於賊股中

最爲狡悍經官兵疊次痛殲勢已日見窮蹙又有
額勒登保統領重兵由紫陽截剿而長麟辦竣沔

南零星賊匪卽可與經畧會合剿辦似亦無難剋
期蕝事現在一切軍火糧餉最爲緊要前已降旨
令山東江西共撥銀五十萬兩迅速解往昨據惠

齡奏東省所撥銀兩業已分起赴陝自足敷用若
日內額勒登保將高馬等股殲擒卽移師赴川則
陝省存兵較前減少軍需自可大加節省倘該處
因防堵未能全撤以及善後事宜尙有需用之處
朕當酌量情形隨時接濟不待該撫奏請卽行撥
給該撫務當督率屬員妥爲經理不可稍有虛糜
仍當於撙節之中俾軍營供支毫無闕乏方爲妥

善

同日

上諭內閣曰陝西扶風鳳翔等處本年秋收款薄曾

經降旨加恩賑卹至岐山一縣地界毗連且爲棧

道往來大路曾有團勇防堵之事聞秋收亦屬歉

薄自當一律矜恤著將該縣本年應徵錢糧一併

緩至來年麥秋後征收

初七日

乙酉

慶成奏言竊

臣

接護撫篆後因分防

各兵尙未抽調到齊卽在西鄉督催各路糧餉

并籌辦防堵章程查西鄉東南扼要地方原擬

總兵胡定泰汪啟駐紮王黑壩分截川匪折竄

之路此時汪啟因伍逆後股餘匪尙在終南山

竄匿該鎮尙在石泉一帶堵截胡定泰在黃官

嶺檄調尙未到來因連接稟報川省各匪經德

楞泰勒保督兵剿急分投折竄陝境盡入西鄉

東南邊界

臣

連夜趕回西鄉適副都統阿哈保

接經畧札調帶兵入川由西鄉南路前往正可

沿途迎擊但東南山徑叢雜賊匪往往此截彼

竄東南王黑壩一帶原擬防堵之總兵等均未

帶兵到來現有叅將海洪阿奮勇出衆已奉經

畧題補副將

臣

隨奏齊兵勇三千名派該將管

領由東路進發與阿哈保均於本月二十三日
起程兩路並進以壯聲勢今該將至五塊石王
黑壩地方適中扼要先行安設營卡以便胡定
泰到彼統率堵剿詎海洪阿等於二十四日行
抵馬家灣地方卽遇川省折回之賊接仗施放
鎗礮自卯至申屢次衝壓殺死賊匪甚多并礮
斃僞元帥朱朝閣忽後股賊匪踵至敗匪退而

復回海洪阿身先兵勇奮力衝殺深入賊隊衆

寡不敵受傷陣亡守備穆克登布猝被戕害弁

兵亦有傷亡兵勇力單均據守山梁民寨該匪

等尙四面攻圍

臣

聞信卽連夜抽帶馬步兵勇

馳往接應適副都統綸布春患病在西鄉調養

漸愈一同前往該匪等知有援兵前去膽敢前

來迎敵二十五日行抵板樸堙土地嶺一帶卽

遇該匪等蜂擁而來搖旗吶喊兇悍異常臣親

率兵勇搶上山梁鎗礮並施馬隊由道上衝壓

自辰至未賊數次撲上皆被我兵擊退猶敢公

然抵敵臣自帶數人首先直衝賊隊綸布春同

遊擊吳亨衍分帶兵勇從旁抄擊賊衆始慌亂

敗退我兵乘勢追殺刀矛並舉先後殺賊二百

餘名賊匪由漢溪河原路奔竄兵勇追殺三十

餘里又殺賊一百餘人，生擒活賊李華等。傍晚

兵勇少息，連夜鼓勵跟蹤向南緊追。中途據差

探回報兩股賊匪一股由馬家灣原路奔逃，一

股於四更時向北折竄白沔峽，係走瓦脊溝七

里壩江岸之路。臣伏思一月以前伍逆餘匪曾

已偷渡刻下江水涸淺更甚處處可涉，雖有卡

勇防堵甚不足恃，當卽帶兵折轉抄截。行至瓦

脊溝地方該匪果突衝卡勇正在涉淺淌渡猝

見官兵趕至紛紛亂奔臣與綸布春各帶馬隊

分投剿殺登時將南岸未渡之賊盡行殲斃其

淌至江中身帶鎗箭之賊淹斃尤多臣等復帶

領馬兵過江跟追三十餘里又殺賊一百餘名

生擒活賊二十七名餘匪數百人紛紛向東奔

散訊據獲賊供稱此股賊目係冉學勝與川楚

擊散各股零匪合夥有三千餘人連被官兵剿

殺昨日打散各自奔逃再學勝帶數百人半夜

折回北竄又一股仍由原路回川等語所獲之

賊均係強壯戰手立即正法查瓦脊溝七里壩

西通洋縣東接石泉俱可竄入南山總兵江啟

近在石泉之銀杏壩一帶堵截臣飛咨該鎮先

卽帶兵探迎此股截剿臣剿賊途次又連接漁

渡營稟報賊匪由木竹河竄至平西山入七里溝又另股賊匪由五塊石至麻柳灘又西鄉稟

報賊匪苟鮮王徐等逆自漁渡壩至毛埡塘紫陽稟報龍逆一股由鐵板溪向北奔竄入西鄉

之小河口此時東南一帶據報北竄入陝股數較多阿哈保所帶兵力不過截剿一路西鄉東南道路紛歧萬分喫緊之際防堵大局未定該

處現無大員臣若徑往追剿此股賊匪恐由川

折回各股匪徒復尋前蹤北竄是以先令汪啟

就近截剿且毋庸前來西鄉總兵穆克登布亦

在南山剿捕伍逆餘孽卽此起偷渡殘匪竄往

合夥兵力亦敷剿洗臣復與長麟札商趕緊於

陝甘防兵內酌抽精壯者另派幹練將領馳往

協剿期以迅速殲除聞撫臣陸有仁月內可抵

漢中因將巡撫關防文案於二十九日委遊擊

韋洪齋送府城候交臣現在先分探各股折回

竄匪何股賊蹤較近卽奮力迎頭堵截斷不使

復由前蹤北遁至此次分股賊匪自瓦脊溝偷

渡之處因防兵陸續未齊先儘分撥東南堵剿

之兵尙未於該處安設營卡臣剿賊到彼乃知

係劉之仁關騰等分防之所不及祇有本地鄉

勇不足抵禦以致該匪躡淺偷渡實屬踈漏愧

悚無地

臣

仰蒙

天恩棄瑕錄用

特命辦理防堵事宜未能籌及於前斷不敢事後隱

飾諉卸惟乞

聖明將臣嚴加治罪以爲踈防者戒奏入

上命軍機大臣傳諭額勒登保慶成曰川省賊匪經

德楞泰勒保追剿緊急分投折竄陝境慶成派海

洪阿與阿哈保帶兵分路並進扼要堵剿海洪阿

因衆寡不敵受傷陣亡慶成卽抽帶馬步兵勇馳

往接應在板橋埡土地嶺一帶遇賊接仗殲賊三

百餘名生擒一百五十餘名賊匪一股由馬家灣

原路奔逃一股向北折竄白沔峽慶成復帶兵抄

截於瓦脊溝見賊匪涉淺淌渡漢江將南岸未渡

之賊盡行殲斃過江跟追又殺賊一百餘名此股
北竄賊匪經慶成訊據獲犯供稱係賊目冉學勝
其自瓦脊溝偷渡因防兵陸續未齊先儘分撥東
南堵剿之兵尙未於該處安設營卡爲劉之仁關
騰等分防之所不及伊二人尙無大過慶成則係
額勒登保奏明派令總統防堵之人不能先事豫
籌致任賊匪躡淺偷渡究屬疎防其自請嚴加治

罪本所應得姑念慶成此次殲賊多名餘匪偷渡之處防兵未集祇有本地鄉勇不足堵禦尙非有心玩悞免其治罪仍著傳旨嚴行申飭卽責令慶成戴罪立功自贖督飭汪啟穆克登布等將此股竄匪卽在陝境辦竣勿令再折回川至額勒登保前奏稱陝楚肅清後卽當整旅入蜀今冉學勝一股旣折竄漢江以北而苟鮮王徐等逆又自漁渡

壩竄至毛堽塘龍逆一股由鐵板溪竄入西鄉之
小河口是川匪各股又折入陝境額勒登保此時
仍當在陝督剿不可遽往川省現在西鄉東南並
無大員防堵最關緊要且瓦脊溝等處西通洋縣
東接石泉俱可竄入南山慶成現已札會汪啟帶
兵迎截而穆克登布亦在南山剿捕伍逆餘匪可
以就近截擊額勒登保再當嚴行督催務將陝境

各股竄匪迅速殲除不得再有遲緩况冉學勝剿

敗餘匪不過數百人卽與伍逆合夥亦祇千餘人

而穆克登布一路兵勇共有七千餘名又有汪啟

帶兵前往以數倍賊匪之兵力擊此敗竄之賊何

難速行撲滅現在慶成札商長麟於甘省防兵內

酌抽精兵派員帶領馳往協剿究恐緩不濟急額

勒登保前所稱防兵三萬究在何處應卽扼要防

堵其竄川之賊專交慶成督令防江各員嚴密堵
剿倘再令竄入陝境必當從重治罪决不寬貸所
有殺賊陣亡之副將海洪阿守備穆克登布俱著

咨部賜卹